

Morning Regional Dogri News Bulletin, 26th October 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. राष्ट्रपति द्रौपदी मुर्मु होरें जोर देइयै आखेआ ऐ जे आर्टिफीशियल इन्टेलीजेंस केई सारे खेत्तरें च युवाएं लेई नमें मौके खोलोग। उनें उच्च शिक्षा इदारे दा आह्वान कीता ऐ जे ओह स्थानी स्तर दिएं समस्याएं लेई घट्ट लागत आहले हल कइडने गी मती तरजीह देन।
2. फौज दी उत्तरी कमान दे जनरल आफिसर कमांडिंग इन चीफ होरें आखेआ ऐ जे उंदा मकसद हिंसा दे माड़े दौर गी खत्म करना ते आतंकवादी तंत्र गी पूरी चाल्ली तबाह करना ऐ।
3. प्रधानमंत्री नरेन्द्र मोदी कल आकाशवाणी पर मन की बात कार्यक्रम राहें अपने विचार देश-विदेश दे लोकें कन्नै सांझे करडन।
4. समूलचे जम्मू-कश्मीर च अज्ज विलय दिवस मनाया जा करदा ऐ।
5. ते पुणे च खेड्डे जा करदे मजूदा श्रृंखला दे दुए टेस्ट मैच दे अज्ज त्रीये ध्याड़े न्यूजीलैंड दी टीम अपने कल्लै दे स्कोर 5 विकेटें दे नुकसान उप्पर 198 रन्जें दे स्कोर परा अगगे खेड्डना शुरू करोग।

<><><><><><>

Prez AI

राष्ट्रपति द्रौपदी मुर्मु होरें आखेआ ऐ जे आर्टिफीशियल इन्टेलीजेंस पूरी दुनिया लेई महत्वपूर्ण होई गेदा ऐ ते एहदे कन्नै बक्ख-बक्ख खेत्तरें च युवाएं लेई केई सारे नमें मौके उपलब्ध होडन। उनें आखेआ जे एहदे कन्नै इंजीनियरिंग दे खेत्तर च नमिएं काहडें गी बी बढावा मिलोग। राष्ट्रपति होरें एह गल्ल कल छत्तीसगढ दी राजधानी रायपुर च राष्ट्रीय प्रौद्योगिकी संस्थान-एन.आई.टी. दे दीक्षांत समारोह च आखी। उनें आखेआ जे भारत, आर्टिफीशियल इन्टेलीजेंस सरबन्धी वैश्विक सांझेदारी दा संस्थापक सदस्य ऐ। राष्ट्रपति होरें आखेआ जे स्थानी समस्याएं दा सस्ता हल तुप्पना उच्च शिक्षा संस्थानें दी प्राथमिकता होनी लोडचदी ऐ। उनें आखेआ जे इनें इदारे दा पेशेवर नजरिया वैश्विक होना चाहिदा, जेहदा लाह मुकामी लोकें गी बी मिलै।

<><><><><><>

India-Germany

भारत ते जर्मनी नै दपक्खी सरबंधें गी होर बढ़ावा देने दे मकसद कन्नै कल ग्रीन हाईड्रोजन थमां लेइयै नमिएं काहडें ते नमिएं तकनीकें दे खेत्तरें च केई क्षेत्रें च केई समझौते ते सैहमति पत्रें पर दस्तखत कीते। दपक्खी रिश्ते गी मजबूत करने दे मकसद कन्नै एह समझौता ते सैहमति पत्रें दा प्रधानमंत्री नरेन्द्र मोदी ते जर्मनी दे चांसलर ओलाफ शोलज हुंदी मजूदगी च आदान-प्रदान कीता गेआ। भारत ते जर्मनी नै गोपनीय सूचना दे सांझा करने ते उसी सुरक्षत रखने पर सैहमति जताई। दौनों देशें किट्ठे रलियै ग्रीन हाईड्रोजन दे विकास आस्तै नमीं तकनीक दे इस्तेमाल पर बी अपनी वचनबद्धता जाहर कीती।

<><><><><><>

CJI AIR

भारत दे प्रधान न्यायधीश जस्टिस डी.वाई.चन्द्रचूड़ होरें न्यायपालिका सनें कम्मकाज आले होरने खेत्तरें च महिलाएं दी मती हिस्सेदारी दी जरूरते पर जोर पाया ऐ। आकाशवाणी सताचार कन्नै इक खास गल्लबात च उनें आखेआ जे एहदे नै महिलाएं दे पक्ख गी जानना ते फैसले लैना असान होग। न्यायमूर्ति चन्द्रचूड़ होरें आखेआ जे देस भरै च जिला न्यायपालिका लेई होए दे मतेयाने च 50 प्रतिशत शा मती भर्थियां महिलाएं दियां होइयां न। उनें मेद जाहर कीती जे एहदे नै महिला न्यायपालिका च उच्चे औहदे तगर पुज्जी सकगंन।

<><><><><><>

Army Commander

उत्तरी कमान दे कमांडर लैफ्टिलेंट जनरल एम.वी.सुचिन्द्र कुमार होरें गलाया ऐ जे केन्द्र शासत प्रदेश ते चेचा करी कश्मीर च हाल च बधा'रदे आतंकवादी हमलें थमां निबड़ने लेई इक असरदार रणनीति तैआर कीती गई ऐ। कल उधमपुर च पत्रकारें कन्नै गल्लबात करदे होई जीओसी इन चीफ होरें गलाया जे वीरवारें श्रीनगर एकीकृत मुख्यालय च इक बैठक च एहदे उप्पर बचार बमर्श कीता ते एहदे कन्नै निबड़ने लेई इक असरदार रणनीति बी तैआर कीती गई। श्री कुमार होरें गलाया जे जम्मू कश्मीर च शांति, खुशहाली ते बेहतर सुरक्षा स्थिति सेना ते होर दुइएँ अजेंसिएँ दे सशक्त जतनें दा नतीजा ऐ। उनें गलाया जे हिंसा गी खत्म करने बक्खी ध्यान केन्द्रित कीता जा'रदा ऐ ते सुरक्षा बलें पिछले 5एँ ब'रें दरान 720 आतंकिएँ गी मारी मकाया ऐ। सेना कमांडर होरें दस्सेआ जे 600 शा मते ग्राम रक्षा समूह स्थापत कीते जा'रदे न ते उनेंगी सिखलाई दे कन्नो कन्नी 10 जहार शा मते आधुनिक थेआर बी उपलब्ध करोआए जा'रदे न।

<><><><><><>

Minister Drugs

समाज कल्याण, शिक्षा, सेहत ते मैडिकल शिक्षा मंत्री सकीना मसूद होरें अफसरें गी जम्मू कश्मीर च नशे दी कबैतु उप्पर काबू करने लेई असरदार रणनीति तैआर करने लेई गलाया ऐ तां जे नोजवान पीढ़ी गी एह्दे थमां बचाया जाई सकै। कल समाज कल्याण विभाग दी जायजा बैठक दी प्रधानता करदे होई मंत्री होरें अफसरें गी जोर देइयै आखेआ जे ओह् दुए विभागें कन्नै आपसी तालमेल बनाइयै कम्म करन ते समाज थमां इस बुराई दा सफाया करी देन। मंत्री होरें अधिकारिणं गी हर इक जिला ते उप-जिला अस्पतालें च नशे दी लत छड़ाने आले डी-अडिक्शन केन्द्रें गी स्थापत करने दे निर्देश बी जारी कीते। बैठक दरान होर दुइए स्कीमें दी कारकरदगी दा बी जायजा लैता गेआ जे ब्याह च दित्ती जाने आली मदाद गी 50 ज्हार शा बधाइयै 75 ज्हार करने उप्पर बी बचार कीता गेआ।

<><><><><><>

JK Bank

जम्मू कश्मीर बैंक नै जंदे शुक्रवारें सितम्बर म्हीने तगर दी तिमाही दरान अपने शुद्ध लाभ च 45 प्रतिशत दा बाद्धा दर्ज कीता ऐ। पिछले ब'रे दी इस्सै तिमाही दरान जम्मू कश्मीर बैंक नै 381 करोड़ 7 लक्ख रपे दा मुनाफा कमाया हा जेहड़ा इस बारी बधियै 551 करोड़ होई गेआ ऐ। जारी ब्यान च इब्बी दस्सेआ गेआ ऐ जे इस ब'रे अप्रैल थमां सितम्बर तगर बैंक दा शुद्ध लाभ 36.6 फीसद बधियै 966 करोड़ 41 लक्ख रपे होई गेआ ऐ जेहड़ा पिछले ब'रे दी इस्सै अवधि दरान 707 करोड़ 52 लक्ख रपे दर्ज कीता गेआ हा।

<><><><><><>

Man Ki Baat

प्रधानमंत्री नरेन्द्र मोदी होर कल आकाशवाणी दे मन की बात प्रोग्राम च देश प्रदेश च रवा'रदे लोकें कन्नै अपने बचार सांझे करगन। एह् इस रेडियो प्रोग्राम दी 115मीं कड़ी होग। प्रोग्राम दा प्रसारण आकाशवाणी ते दूरदर्शन दे पूरे नेटवर्क एयर न्यूज़ वैंबसाईट ते न्यूज़ ऑन एयर मोआइल ऐप उप्पर होग। एह्दे इलावा आकाशवाणी ते डीडी न्यूज़ दे यूट्यूब चैनलें उप्पर एह्दा सिद्धा प्रसारण कीता जाग। आकाशवाणी प्रोग्राम दा क्षेत्रीय भाषा च अनुवाद हिंदी प्रसारण दे तुरत परैंत करी देग।

<><><><><><>

Accession Day

समूलचे जम्मू-कश्मीर च अज्ज विलय दिवस मनाया जा करदा ऐ। अज्जै दे ध्याड़े सन् 1947 च उस बेल्ले दे डोगरा शासन महाराजा हरी सिंह होरें भारत सरकार कन्नै विलय पत्र पर दस्तख्त कीते हे जेह्दे कन्नै जम्मू-कश्मीर दे भारती संघ कन्नै विलय दी बत्त पदरी होई गई ही। इस ध्याड़े पर ब'रे 2020 च पैहली बारी

सरकारी छुट्टी दा ऐलान कीता गेआ हा। अज्जै दे ध्याड़े जम्मू-कश्मीर च केई सारे कार्यक्रमें दा सरिस्ता कीता जा'रदा ऐ जिंदा मुख मकसद एकता, रमानदारी ते तरक्की दे कन्नो-कन्नी खित्ते दी बन्न-सबन्नी संस्कृति दा संदेस फैलाना ऐ।

<><><><><><>

Satish Sharma

खाद्य, सिविल सप्लाई उपभोक्ता मामले ते ट्रांसपोर्ट मंत्री सतीश शर्मा होरें कल जम्मू च शशि अबरोज जिंदी गांदरबल दे गगनगीर च होए दे आतंकी हमले च मौत होई गई ही, दे परोआर आलें कन्नै मलाटी कीती। मंत्री होरें पीड़ित परोआर कन्नै गैह्रा बसोस जाहर करदे होई उनेंगी सरकार दी तरफा हर मुमकन मदाद मिलने दा भरोसा दित्ता। शर्मा होरें गलाया जे मुखमंत्री उमर अब्दुल्ला हुंदे नेतृत्व आली सरकार नै पीड़ित परोआर गी हर संभव मदाद मुहैया कराने दा पक्क ध्याई दी ऐ ते पूरा प्रशासन इस दुखै आली घड़ी च सौहगे परोआर कन्नै खड़ोते दा ऐ।

<><><><><><>

Poonch

पुंछ जिले च शुक्रवार बरूदी सुरंग दे फटी जाने करी इक जने दे घायल होने दी खबर ऐ। साढ़े पुंछ दे संवाददाता अनुभव मिसरी होरें जानकारी दित्ती ऐ जे 40 ब'रे दे हनीफ होर सरहदी इलाके शाहपुर इलाके च अपने क्षेत्र लकड़ी किट्ठा करने गे, जिस दरान एह हादसा होआ। उनेंगी इलाज लेई अस्पताल पजाया गेआ ऐ।

<><><><><><>

Mission Shakti

समाज कल्याण विभाग दे मिशन शक्ति दा संकल्प-हब जेहड़ा जे जम्मू दिएं महिलाएं दे सशक्तिकरण गी समर्पत ऐ, नै कल जम्मू दे बक्ख-बक्ख सरकारी शिक्षा संसीनें च जाग्रती सत्र दा आयोजन कीता। जाग्रती प्रोग्राम दा सरिस्ता गौरमेंट हायर सकेंडरी स्कूल सतवारी, गौरमेंट जागते दे हायर सकेंडरी स्कूल सतवारी, गौरमेंट कुड़िएं दे हायर सकेंडरी स्कूल गांधी नगर, जागतें दे हायर सकेंडरी स्कूल गांधी नगर ते गौरमेंट कुड़िएं दे कालेज च कीता गेआ। प्रोग्राम दा उद्देश्य विद्यार्थिएं गी उंदे कल्याण लेई बनाई गेदिएं बक्ख-बक्ख सरकारी स्कीमें बारे जानकार करना हा। इस मौके मिशन शक्ति संकल्प हब दे अधिकारिएं प्रधान मंत्री मातरु वंधना योजना ते होर दुइएं योजना बारे व्यापक जानकारी सांझी कीती। इस मौके मुख ध्यान समाज कल्याण विभाग आस्सेआ पट्टीदर्ज जाति दे विद्यार्थिएं गी दित्ते जाने आले प्री ते पोस्ट मैट्रिक स्कालरशिप उप्पर दित्ता गेआ।

<><><><><><>

India-NZ

क्रिकेट च न्यूजीलैंड 198 रंजें दे अगगे अपनी दूर्ई पारी भारत खलाफ खेडोग। दुए टैस्ट मैच दे त्रीए दिन एह मैच पुणे च अज्ज बडलै खेड्डेआ जाग। मैच मुक्कने तोड़ी ग्लेन फीलिप्स 29 गेंदे पर 9 रंज बनाइयै क्रीज पर हे ते टॉम ब्लूडेल नै 5. रंजें दा योगदान दित्ता। न्यूजीलैंड टीम 301 रंज दी बढत कन्नै अगगे ऐं न्यूजीलैंड दी पैहली पारी च टीम 259 उप्पर ऑल आउट होई गई जेहदे च ऑल राउंडर वाशिंग्टन सुंदर नै पैहली पारी च 7 विकेटां लैतियां। बेंगलुरु च पैहला टैस्ट मैच 8 विकेटें कन्नै जित्तने मगरा न्यूजीलैंड दी टीम 1-0 कन्नै अगगे ऐ।

<><><><><><>